

FÈVRI.

Èst ç' qui ça va durer, ç' tims là ?

On bleuw ciél, qu'on vwèt l' pîre castin.ne d'au pondant jusqu'au coûchant.

On p'tit fin brouliârd, qu'a yeû tote li nêt po s' mète à s'te auje, èt asteûre, fé l' long cu po staurer s' blanc linçouû d' rèleye pa t't-avau l' payisadje qu'èst co tot èdwarmu.

Aurîz bin yeû dit qu' c'èst ça qui l' solia ratindeut po v'nu mostrer sès cwanes, vos ?

Il a co l'aîr one miète flauwe tot l' min.me. Trop blanc po nos v'nu fé acrwêre qu'i va lûre di deûs dobés audjoûrdu. Èt portant, rin qu' do veûy qu'i s'a lèvé à l' bèle eûre, à môde di djin, vo-nos-la d'dja tot rapaujetés.

Sèreut ç' li bon tims qui r'vint po d' bon ?

Lès mouchons d' twèt, qui là dès mwès qu'on n'lès-ètindeut pus, ont rac'mincî à s' dispètroner, lès-agaces à tchaweter. Ètur lès toûrtèrèles èt lès colon-mansauds, c'èst-au cé qu' rôkîyerè l' pus fwârt.

Lès masindjes, pus sérieûses èt ènovrées qui tos cès tchafiauds là, èlle ont pris d' l'avance, zèles. Èle sont d'dja à cachî après l' boune coche po-z-î fé leû nid. Èt sondjî qu' i faurè rëcayuter leûs djon.nes à l' saîson.

Jusqu'aus tchambaréyes qu'ont planté leûs bowéyes di vèt' dwègts, plic-ploc, come po mète leûs djanes câlices à yute, quand i s'auront dècidé à s' douviè.

N' èst ç' nin bon sine, tot ça ?

Nos n' dimanderin.n' nin mia, nos-ôtes. Mins dins l' fond, nos savans bin qui ç' sèreut murauke. Gn-a qu'à lèyî couru on-ouy su l' calendriyer po r'mète nos-idéyes à leû place : à pwin.ne au mitan d' fèvri, li p'tit mwès come on l' lome tofêr.

Quand on cause di li, ci n'èst jamaîs po-z-è dîre do bin :

« Fèvri li r'bot, quand i s'î mèt, c'èst l'pus laîd d' tot. » ou bin :

« Ci qu' fèvri n' done nin à l' tièsse, i l' dôre à l' quèwe. »

Cès spots là nos vègnenut rapèler qu' l'iviêr n'èst nin co yute, qu'il aureûve co bin aurdé, o fond di s' musète, one picîye di djaléye, di nîve èt d' miséres. Maugré tot, lès saquants râres rèyons qui l' solia nos-a avoyî nos-ont r'chandi nosse keûr, nos rinde coradje, èt nos mostrer qui n's-èstans bin su l' boune vôle.

Nos sèrin.n' si télemint bunaujes tortos si ç' sèreûve li vraî.

Èt sondjî qu' è fiant pés qu' fwace, nos pôrin.n' gangnî one cope di samwin.nes.

Ci sèreut todi ça d' pris, s'apinse l' avâre !

Albert DELVAUX